



Broj: 05-50-1-2644/16  
Sarajevo, 3.11.2016. godine

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

03.11.2016

PRIMLJENO:			
Organizaciona jedinica	Klasifikaciona grupa	Redni broj	Broj priloga
01-50	1-15	85	16

PARLAMENTARNA SKUPŠTINA BiH

- Zastupnički dom -


SARAJEVO

**PREDMET:** Odgovor na zastupničko pitanje – dostavlja se

Vijeće ministara Bosne i Hercegovine, na 79. sjednici održanoj 3.11.2016. godine, utvrdilo je Odgovor na zastupničko pitanje koje je postavio Šefik Džaferović, zastupnik u Zastupničkom domu Parlamentarne skupštine Bosne i Hercegovine.

U privitku proslijeđujemo Odgovor radi njegovog dostavljanja zastupniku.

S poštovanjem,





Bosnia and Herzegovina  
COUNCIL OF MINISTERS

Broj: 05-50-1-2644/16  
Sarajevo, 3.11.2016. godine

ŠERIF DŽAFEROVIĆ, poslanik u Predstavničkom domu Parlamentarne skupštine Bosne i Hercegovine, je dana 29.08.2016.godine, u skladu sa članom 170. stav (1) Poslovnika Predstavničkog doma Parlamentarne skupštine BiH, postavio je Vijeću ministara BiH, odnosno Ministarstvu sigurnosti BiH, poslaničko pitanje u pisanom obliku a glasi

„Da li su ispoštovani propisi Bosne i Hercegovine vezano za učešće pripadnika policije MUP-a entiteta Republika Srpska u zajedničkoj policijskoj vježbi s pripadnicima policije Republike Srbije koja je održana 28.08.2016 godine, u zoni graničnog prijelaza između Bosne i Hercegovine i Republike Srbije, na teritoriji Republike Srbije.

Ovo se posebno odnosi na pitanja da li su pripadnici policije entiteta Republika Srpska imali odobrenje institucija države Bosne i Hercegovine za učešće u ovoj vježbi? Da li su ispoštovane odredbe Zakona koji reguliše pitanje učešća vojnih, policijskih i državnih službenika u misijama izvan Bosne i Hercegovine? Da li su i na koji način ispoštovane procedure koje se tiču granične kontrole, a posebno one koje se tiču prelaska državne granice, te iznošenje opreme i naoružanja iz Bosne i Hercegovine? Putrebno je da se u odgovoru osvrnete i na druge aspekte organizacije navedene policijske vježbe.“

Na postavljeno poslaničko pitanje, Vijeće ministara Bosne i Hercegovine je na 79. sjednici održanoj 3. 11. 2016. godine, utvrdilo sljedeći

## ODGOVOR

Granična policija Bosne i Hercegovine je odmah, po prijemu najave o izvođenju i održavanju zajedničke antiterorističke vježbe specijalnih i posebnih jedinica MUP-a Republike Srpske i MUP-a Republike Srbije, kao i o svim drugim raspoloživim informacijama obavijestila Ministarstvo bezbjednosti Bosne i Hercegovine. U skladu sa dostavljenim najavama Granična policija BiH je blagovremeno o tome upoznala i Upravu za indirektno/neizravno oporezivanje BiH, te je preduzela sve potrebne mjere koje su se odnosile na provođenje graničnih provjera, bezbjednost putnika i prevoznih sredstava.

Pored navedenog Granična policija BiH je provela aktivnosti na informisanju javnosti o planiranim terminima privremenog zatvaranja GP Trbušnica (na teritoriji Republike Srbije), sa apelom građanima da u cilju izbjegavanja bespotrebnih zadržavanja prilikom namjeravanog prelaska državne granice koriste alternativne granične prelaze. Za vrijeme priprema i samog izvođenja vježbi policijski službenici JGP Zvornik i JGP Višegrad su vršili pojačane aktivnosti neophodnih graničnih provjera i nadzora državne granice na području međunarodnog graničnog prelaza „Šepak“. U vezi toga ostvarena je razmjena informacija sa pripadnicima MUP-a Republike Srpske, kao i carinskim organima na navedenom graničnom prelazu.

Prema pripadnicima MUP-a Republike Srpske koji su učestvovali na predmetnoj vježbi, u saradnji sa carinskim službenicima Uprave za indirektno/neizravno oporezivanje, su izvršene granične provjere, u skladu sa dostavljenim najavama i odredbama Zakona o graničnoj kontroli („Službeni glasnik BiH“ broj: 53/09, 54/09 i 47/14).

Važno je istaknuti da Zakon o graničnoj kontroli ne sadrži odredbe koje se odnose na prelazak državne granice BiH pripadnika službi bezbjednosti Bosne i Hercegovine. Odredbama člana 36. Zakona o graničnoj kontroli propisan je ulazak pripadnika stranih službi bezbjednosti u BiH. Odobrenje za ulazak pripadnika stranih službi bezbjednosti na području Bosne i Hercegovine izdaje Granična policija BiH, uz predhodno pribavljenu saglasnost Ministarstva bezbjednosti BiH, pod uslovom da to nije u suprotnosti sa interesima Bosne i Hercegovine. S obzirom da u konkretnom slučaju nije bilo prelazaka državne granice BiH pripadnika stranih službi bezbjednosti, Granična policija BiH nije izdavala nikakva odobrenja za ulazak pripadnika stranih službi bezbjednosti i prenos oružja preko državne granice koja su se odnosila na predmetnu vježbu.

Odredbe Zakona o učešću pripadnika oružanih snaga Bosne i Hercegovine, policijskih službenika, državnih službenika i ostalih zaposlenika u operacijama podrške miru i drugim aktivnostima u inostranstvu („Službeni glasnik BiH“ broj: 14/05), definišu operacije za podršku miru i druge aktivnosti u inostranstvu koje podrazumijevaju: operacije sprječavanja sukoba, operacije uspostavljanja, očuvanja, provođenja i izgradnje mira, humanitarne operacije, učešće u aktivnostima međunarodnih bezbjednosnih i odbranbenih organizacija, učešće u vojnim vježbama i otklanjanje posljedica terorističkih napada, pri čemu odluku o učešću donosi Predsjedništvo BiH, odnosno nadležna ministarstva u Savjetu ministara BiH čiji se pripadnici upućuju u određenu operaciju podrške miru.

Obzirom da se u konkretnom slučaju ne radi o „operacijama podrške miru“ u smislu navedenog zakona, predmetne vježbe se organiziraju i sprovode u skladu sa relevantnim

odredbama sporazuma koji definišu međunarodnu policijsku saradnju, kao što su Sporazum između Savjeta ministara BiH i Vlade Republike Srbije o policijskoj saradnji („Službeni glasnik BiH” – međunarodni ugovori broj:09/11) i Konvencije o policijskoj saradnji u Jugoistočnoj Evropi („Službeni glasnik BiH” – međunarodni ugovori broj:04/07), ili u skladu sa zakonom koji reguliše rad predmetne policijske agencije. Predmetni Sporazum i Konvencija kao oblici policijske saradnje, navode između ostalog i zajedničko provođenje vježbi, učešće na seminarima, obuku kadrova i slične aktivnosti. Međutim, navedeni dokumenti/propisi ne sadrže odredbe kojima se traži formalno-pravno odobrenje određenog organa ili institucije BiH za učešće u ovim aktivnostima, koje bi bile obavezujuće za GP BiH, u smislu davanja eventualnog odobrenja za prelazak državne granice, odnosno odlazak pripadnika bezbjednosnih službi u inostranstvo.

Takođe, treba napomenuti da je održana zajednička vježba MUP-a Republike Srpske i MUP-a Republike Srbije izvedena na teritoriji Republike Srbije. Granična policija BiH je omogućila prelazak državne granice preko graničnog prelaza Šepak, pripadnicima MUP-a Republike Srpske, koji su bili učesnici vježbe, u uniformi, sa ličnom opremom, naoružanjem i vozilima, koja su se koristila u toku izvođenja vježbi. Granična policija BiH je, u saradnji sa Upravom za indirektno/nezravno oporezivanje BiH, prilikom prelaska državne granice pripadnika MUP-a RS vršila kontrole specificirane službene opreme kao i naoružanja koje se prenosilo preko državne granice. GP BiH je u vrijeme navedene vježbe pojačala aktivnosti kontrole, na području GP Šepak i u graničnom pojasu u zoni GP Šepak, sa ciljem omogućavanja izvođenja vježbe ali i sprečavanja narušavanja bezbjednosti državne granice, te bezbjednosti ljudi i imovine.

Važno je istaknuti da su, pored MUP-a Republike Srpske i predstavnici drugih policijskih agencija u BiH ( Državna agencija za istrage i zaštitu BiH, Federalno ministarstvo unutrašnjih poslova BiH) u ranijem periodu učestvovali u zajedničkim vježbama, u kojima su koristili vlastito službeno naoružanje, municiju i opremu, a održavale su se u Republici Srbiji i drugim državama. I u ovim slučajevima, uz predhodnu najavu prelaska državne granice pripadnika bezbjednosnih službi BiH, Granična policija je postupala na isti način i u skladu sa odredbama važećih propisa.